

春秋說畧

春秋說畧卷四

樓賈郝懿行學

海陽趙銘彝校刊

閔公

元年春王正月

繼故不卽位不忍也閔繼般僖繼閔非君父也從之受國一也

齊人救邢

夏六月辛酉葬我君莊公

秋八月公及齊侯盟于落姑

傳曰請復季友也齊侯使召諸陳公請齊者假霸權魯茲黨季子來歸

曰季子曰仲孫曰高子方氏苞以此類皆舊史之文理或然

也不名者魯人重之也然則孔子不革何也欲革之則不可盡革或有革其號而不得其名者矣故仍之孔子曰其文則史其義則吾竊取之矣季子魯人何以曰來來者明有去也去將不來矣喜之曰來也異於奉使故不曰至也歸者必有奔也嫌於以異奔故不書奔也書公子友如陳葬原仲

冬齊仲孫來

不稱使不曰聘不書盟則未知以何事來也胡氏謂譏齊桓非也方氏苞曰不名者魯人重之故史不書名至孔子修春秋則名無可徵而事不可削故一仍其舊也

二年春王正月齊人遷陽

夏五月乙酉吉禘于莊公

吉者未可以吉也禘者未可以禘也禘王者之大祭行於大

廟於莊公無祖也不言宮於寢也。○先儒據明堂位謂成王以周公賜魯重祭非也。成王賢主必不爲此。竹書稱魯惠公使宰讓請郊廟之禮。當平王之世。明堂位謬說未可信也。杜氏預曰三年喪畢致新死者之主於廟遠主遷祧因是大祭以審昭穆謂之禘莊公喪制未闕而吉祭又不於大廟故詳書以示譏

秋八月辛丑公薨

九月夫人姜氏孫于邾

文姜也則不稱姜氏哀姜也則稱姜氏何也公薨于齊夫人卽孫齊醜也可揜也。慶父奔莒夫人乃孫邾無嫌也不必揜矣。春秋比事屬辭其義自見上書夫人孫邾下書慶父奔莒一孫也一奔也何爲乎雙雙而俱去也。

公子慶父出奔莒

公子出奔不討賊也縊而不刺非國討也

冬齊高子來盟

來盟者立僖公定魯難不稱使非前定也

十有二月狄入衛

傳言滅經言入何也得而弗居曰入居而勿絕其祀亦曰入鄭棄其師

傳曰鄭人惡高克也然則何不曰鄭高克出奔陳曰高克出奔陳則無以見鄭棄其師之罪也然則何不曰鄭棄其師高克出奔陳重師也抑或高克非卿法不當書也亦猶侵伐者將卑稱師不稱將也春秋舉要不煩稱其事而已○方氏苞曰舊史以傳聞書也自僖二十八年以前外大夫奔皆不書懿行謂魯史書他國之事皆以赴告謂以傳聞書非也此事

安知非以高克來告而書

春秋說略卷四

春秋說畧卷五

棲霞郝懿行學

海陽趙銘鈔校刊

僖公

元年春王正月

齊師宋師曹伯次于聶北救邢

伯當從公  
穀經作師

狄人衛救邢何也邢衛接壤入衛則必及邢矣然則救邢不救衛何也蓋狄已去衛矣斯時戴公廬於濇先言次後言救何也凡次而救成救也救而次不成救也○公穀經作曹師是也左氏下經亦作曹師而此經作曹伯蓋誤

夏六月邢遷于夷儀

齊師宋師曹師城邢

再序三師著實也不言師則不知以師城也若言諸侯則不

知爲三國也言諸侯師則非辭也何以不曰城夷儀邢遷矣  
城邢也亦著實也

秋七月戊辰夫人姜氏薨于夷齊人以歸

夫人薨于內不地于外則地夫人孫邾何以在夷傳曰齊人  
召而殺之書曰薨諱也以歸者歸於齊也僖公請而葬之  
楚人伐鄭

荆號楚始此

八月公會齊侯宋公鄭伯曹伯于榿

傳曰謀救鄭也

九月公敗邾師于偃

冬十月壬午公子友帥師敗莒師于郕獲莒挈

敗邾於偃哀姜故也敗莒於郕慶父故也傳曰求賂也獲戰



得也大夫生死皆曰獲諸侯死曰滅生曰獲○傳曰詐戰曰敗非也內敗外兵皆書曰敗豈盡詐戰

十有二月丁巳夫人氏之喪至自齊

不稱姜前已見也一事而再見者畧之君子諱國惡苟其辭可畧則畧之畧之所以諱之也然則何以不於薨焉諱於薨焉諱則其事遂不可知矣諱其惡而沒其事君子亦不爲也○杜氏預曰不稱姜闕文也非也文姜不稱姜氏何以非闕文此稱氏不稱姜逆婦姜于齊文四年稱姜不稱氏皆非闕文也

二年春王正月城楚丘

楚丘邑名或曰衛邑以詩知之孰城之不知也傳曰諸侯城之非也不書諸侯何由知是諸侯也方氏苞曰魯城之非也

不書城衛楚丘何由知非內邑也杜氏預曰大都以名通者

不繫國

杜說見莊三十二年春秋城小殺下

非也彭城虎牢何以繫國疑經有

闕文矣傳曰不與諸侯專封也非也專封之罪不大於存亡

之功孔子曰如其仁如其仁若不書諸侯是貶緣陵書諸侯

何以非襄

見傷十四年

夏五月辛巳葬我小君哀姜

虞師晉師滅下陽

虞先晉賂故也下陽附庸國也傳曰邑非也邑不言滅言滅

非邑也突入櫟而鄭舉矣入鄭不書不告也下陽滅而虢舉

矣滅虢不書不告也

秋九月齊侯宋公江人黃人盟于貫

傳曰服江黃也服江黃所以孤楚也傳又曰中國稱齊宋遠

國稱江黃以爲諸侯皆至也非也至者至之不至者不至之  
未有諸侯與會而不書者

冬十月不雨

楚人侵鄭

三年春王正月不雨

周之正月非雨節也不雨庸何病經之正月疑三月之誤杜

氏預曰一時不雨則書首月也

案莊三十一年冬不雨不書首月者僅一時也

夏四月不雨

徐人取舒

舒國也取者取爲附庸也或曰書取者恕辭爲其奉霸令披  
楚黨也非也實滅言取豈春秋也

六月雨

凡不雨之書月舉者勤也時舉者慢也歷時而總舉者加慢也有書不雨無書雨者此書六月雨何也喜也勤故喜喜則

書慢故不喜不喜則不書

見莊三十一年文二年十年十三年

秋齊侯宋公江人黃人會于陽穀

傳曰謀伐楚也伐楚之役江黃不與何也與謀也

冬公子友如齊蒞盟

來盟曰來往盟曰蒞傳曰齊侯爲陽穀之會來尋盟也

楚人伐鄭

四年春王正月公會齊侯宋公陳侯衛侯鄭伯許男曹伯侵蔡蔡潰遂伐楚次于陘

先侵蔡誑楚也民逃其上曰潰遂者繼事之辭胡氏謂譏其專非也伐而次何也用大師善持重爲能不戰而屈人兵也

夏許男新臣卒

諸侯外卒在師稱師在會稱會此不言者許男有疾歸國而卒君子謂之不知命

楚屈完來盟于師盟于召陵

盟不稱使非前定也既言來盟于師又言盟于召陵何也盟於師者完之志桓公退舍以禮之故盟召陵方氏苞曰再言盟者既盟於師復盟於召陵非也一盟而已再盟何爲

齊人執陳轅濇塗

秋及江人黃人伐陳

孰及之魯之微者也

八月公至自伐楚

葬許穆公

冬十有二月公孫茲帥師會齊人宋人衛人鄭人許人曹人侵陳

齊桓畧於責楚苛於治陳轅濤塗之罪止於誤軍道耳執其人又侵伐其國甚矣齊桓矜帖荆功未良成而志已溢

五年春晉侯殺其世子申生

春秋書殺世子兄弟目君屬辭之體也曰世子曰弟對君而言也傳曰甚之非也書世子書弟卽是甚之不待目君而見也晉申生宋痤皆自裁目殺者意成乎殺也

杞伯姬來朝其子

傳曰參議也伯姬來因見其子攝行朝禮故書曰朝朝者其子繫之母者子幼不能朝也禮童子侯不朝蓋不可以成人

禮接也

案何休云禮外孫初冠有朝外祖之道此曲說耳

夏公孫茲如牟

傳曰娶焉蓋因聘而逆也

公及齊侯宋公陳侯衛侯鄭伯許男曹伯會王世子于首止  
及以會尊之也諸侯不敢與王世子齒也然則會之奈何王  
將以愛易嫡齊桓爲會以定之禮之變也殊會世子變之禮  
也

秋八月諸侯盟于首止

諸侯不序前日後凡也無中事而復舉諸侯見王世子不與  
盟也尊之也會盟同地而再舉別於異地也

鄭伯逃歸不盟

逃賤者事也言逃歸又言不盟明逃在盟前

楚人滅弦弦子奔黃

春秋左傳卷五 五  
九月戊申朔日有食之

冬晉人執虞公

虞公天子三公也此滅矣不書滅何也不告也傳曰晉修虞祀歸其職貢於王則不以滅告可知不言以歸亦不告也虞公不名史闕也

六年春王正月

夏公會齊侯宋公陳侯衛侯曹伯伐鄭圍新城

秋楚人圍許諸侯遂救許

冬公至自伐鄭

致有二道有以先事致者有以後事致者大先事以先事致大後事以後事致凡致以告廟書也告以先事則以先事書以後事則以後事書不告則亦不書也○傳曰有二事偶則



以後事致後事小則以先事致非也又曰此不以救許致何也大伐鄭也非也伐鄭之義不大於救許或曰伐鄭本事救許繼事出以本事告故還以本事致亦非也二十八年會溫遂圍許繼書公至自圍許則非以本事致明矣

七年春齊人伐鄭

夏小邾子來朝

此鄭也齊桓白天子進之故以爵通本邾國別封故稱小邾鄭殺其大夫申侯

秋七月公會齊侯宋公陳世子款鄭世子華盟于甯母

傳曰謀鄭故也

曹伯班卒

公子友如齊

冬葬曹昭公

八年春王正月公會王人齊侯宋公衛侯許男曹伯陳世子款盟于洮

傳曰謀王室也王人下士也先王入禮也盟王人非禮也○傳曰襄王定位而後發喪蓋左氏謂去年冬王崩然是年冬方見於經豈有秘不發喪終年之理未可信也

鄭伯乞盟

盟而後乞不得與盟也故盟無鄭伯

夏狄伐晉

秋七月禘于大廟用致夫人

禘僭也大廟周公廟也夫人者哀姜也致者祔於廟也夫人得罪先君不可致而致之也夫人葬八年矣至此始致者爲

疑其禮故遲也。方氏苞謂夫人風氏也致生者之辭也若哀姜入廟則當書祔非也祔亦致也禮夫人與祭君母不與祭若風氏入廟以母乎以婦乎以母則無其禮以婦則非所安故知夫人哀姜也哀姜本夫人故但書夫人卽知爲姜氏若風氏非夫人也但書夫人何以見爲風氏乎傳曰貶去氏非也

冬十有二月丁未天王崩

九年春王正月丁丑宋公御說卒

夏公會宰周公齊侯宋子衛侯鄭伯許男曹伯于葵丘

惠王未葬而宰出會蓋王有內難故也周采地也天子三公故以爵稱異於儲君故不殊會宋子者在喪之稱背殯忘哀非禮可知

秋七月乙酉伯姬卒

此未嫁也何以卒許嫁諸侯笄而字矣於其卒也以成人禮禮之猶未嫁故不繫國

九月戊辰諸侯盟于葵丘

曰諸侯盟見宰周公不與盟也先會後盟申明五禁翼戴天王再言葵丘與首止義同

甲子晉侯佖諸卒

冬晉里克殺其君之子奚齊

凡遇弑雖未踰年稱君此其稱君之子何子者在喪之稱也以爲君也而實子以爲子也而君之矣君之子待猶君然則商人弑舍不曰君之子何也君之子也君也其文異其實同君曰弑君之子曰殺何也不言君者不稱弑。傳曰其君之

子者國人不子也非也特稱君者以君爲重耳若非以君爲重但書殺晉子足矣何迂言君之子且親殺者里克一人何足見國人不子也

十年春王正月公如齊

狄滅溫溫子奔衛

傳以溫爲蘇氏邑非也邑不言滅言滅非邑也溫蓋畿內國子爵也溫子不名史闕也。內諸侯之名見於戴記方氏苞疑之謂王臣無五等之爵不當稱子恐非也溫子爵也劉子單子亦爵也方氏以榮叔南季爲行次猶可也以劉子單子等爲尊異之稱不可也溫子國滅矣何以得尊異之稱也晉里克弑其君卓及其大夫荀息

奚齊也則子之卓子也則君之何也奚齊殺於次未葬也未

葬稱子卓子弑於朝已葬也已葬稱君荀息者不食言者也  
君欲殺正則殺之君欲立不正則立之曰臣不食言而已與  
卓皆死○死難之臣皆以來告得書不書不告也  
夏齊侯許男伐北戎

杜氏預曰北戎山戎

晉殺其大夫里克

方氏苞曰非討其弑君之罪也則爲殺其大夫而已非也春  
秋書殺大夫四十七無以別其孰殺之是孰殺之非也且以  
魯史記他國之事但據赴告之辭書曰某國殺其大夫而已  
其是與非何由盡知也春秋美惡不嫌同辭凡殺大夫皆不  
去其官必據傳而別之孰爲非國討故不去其官孰爲稱人  
以殺爲殺有罪孰爲稱國以殺爲殺無罪若罪累上則是紛

紛然惟傳者之所顛倒而必屈經以從也據傳陳洩治楚郤宛皆無罪楚公子側鄭公孫黑皆有罪而皆不去其官傳說紛紛白亂其例何足信乎

秋七月

冬大雨雪

十有一年春晉殺其大夫平鄭父

夏公及夫人姜氏會齊侯于陽穀

夫人聲姜齊侯之女其曰公及夫人猶愈乎公與夫人耳據十八年

秋八月大雩

冬楚人伐黃

十有二年春王三月庚午日有食之

夏楚人滅黃

國滅君死之正也盟于貫也江黃請服管子難之以爲遠齊而近楚若伐而無救則無以宗諸侯矣信矣

秋七月

冬十有二月丁丑陳侯杵臼卒

十有三年春秋侵衛

夏四月葬陳宣公

公會齊侯宋公陳侯衛侯鄭伯許男曹伯于鹹

傳曰淮夷病杞故且爲戎難謀王室也諸侯戍焉

秋九月大雩

冬公子友如齊

十有四年春諸侯城緣陵



傳曰諸侯散辭也桓德衰矣諸侯者誰不知也或曰會鹹者  
也非也會鹹既改歲又間有異事何知非別國諸侯也傳曰  
城緣陵遷杞也非也邢遷夷儀矣此不言杞不言遷何知非  
城虎牢之例而必曰遷杞也卽遷杞者疑經有闕文矣。傳  
云淮夷病杞疑城緣陵而戍之與城虎牢同案地理志注臣  
臨潁也營陵春秋謂之緣陵李穎曰緣陵在今青州之昌樂去  
臨潁不二百里而去杞都之陳畱千數百里杞何由得遷於  
此古事遙遠固多難稽而輿地則千古難昧止緣傳者創  
有此說後人依譌承謬有實而按之者或轉從而怪之矣

夏六月季姬及鄆子遇于防使鄆子來朝

方氏苞曰內女適人者繫國未嫁書字季姬書字而不繫國  
則女而非婦明矣蓋使自擇配故得與鄆子遇也如左傳鄆  
季姬來寧公怒止之而要鄆子使來朝則當書某月鄆季姬  
來某日及鄆子會於防使鄆子來朝以是知公穀二傳於經

爲合也明年季姬歸于郇以始嫁之辭書則此非歸寧益明矣

秋八月辛卯沙鹿崩

案鹿當作麓古字通用

沙鹿晉山也不繫國名山大澤不以封何以書爲天下記異也

狄侵鄭

冬蔡侯肸卒

十有五年春王正月公如齊

公再朝於齊矣杜氏預曰諸侯五年再相朝禮也非也五年一朝天子禮也

楚人伐徐

三月公會齊侯宋公陳侯衛侯鄭伯許男曹伯盟于牡丘

遂次于匡

傳曰遂繼事也次止也有畏也

公孫敖帥師及諸侯之大夫救徐

諸侯在焉而大夫帥師桓德益衰矣

夏五月日有食之

傳曰不書朔與日官失之也

秋七月齊師曹師伐厲

八月螽

九月公至自會

季姬歸于鄆

方氏苞曰內女之歸非失禮不書此以及鄆子遇防而書也

己卯晦震夷伯之廟

雷曰震夷氏伯名或曰字非也春秋無書字之法或曰禮大夫既卒不名故稱字公子友如陳葬原仲亦字也非也杜氏預曰展氏夷諡非也原仲何以不稱諡也或曰大夫沒稱諡若字禮也然而春秋無大夫稱諡若字者也或曰葬而稱諡春秋大夫不書葬故不稱諡也非也原仲書葬矣亦不稱諡也

冬宋人伐曹

宋始背盟也盟會同而諸侯無私爭者三十載

楚人敗徐于蕢林

病齊桓也傳曰徐恃救也

十有一月壬戌晉侯及秦伯戰于韓獲晉侯

凡戰不言伐者省文耳胡氏謂罪晉侯非也不以秦及晉者

內晉外秦也胡氏謂恕秦伯非也君獲不言師敗績君重於師也大夫獲必言師敗績大夫與師敵也

十有六年春王正月戊申朔隕石于宋五是月六鵲退飛過宋都

或言隕星或言隕石何也

據莊七年

夜隕見星故言星晝隕見石

故言石其體石其數五後數下辭也石隕在下故覽形而知數是月者何失其日也失其日則何以言是月避同日也六鵲退飛不言風非風也風則不成飛退則不獨鵲其體鵲其數六先數上辭也鵲飛在上故因數以察形或言宋或言宋都何也于宋者暑辭也宋都者專辭也何以書記異也列國告災不告異告異非禮也災須弔異自警而已

三月壬申公子季友卒

其稱季友何著親貴也胡氏曰魯卿有生而賜氏者季友仲遂命爲世卿也非也世卿多矣非必生而賜氏也季子來歸已稱季矣公子友如齊洫盟穀梁經已作季友未聞生而賜氏也竊疑季友仲遂生皆寵貴於其卒也魯君恩禮有加故舊史特以氏書耳

夏四月丙申鄆季姬卒

內女爲夫人或卒或不卒者告則卒不告則不卒或曰爲之服則卒不服則不卒卒而或葬或不葬者往會則葬不往會則不葬鄆季姬卒不葬魯不會也○內女爲夫人卒葬義當與外諸侯同方氏苞謂內女卒葬法不當書書者禮之變也恐非

秋七月甲子公孫茲卒

冬十有二月公會齊侯宋公陳侯衛侯鄭伯許男邢侯曹伯于淮

傳曰謀鄭蓋鄭爲淮夷所病也邢侯在鄭伯許男下亂王爵也○法氏坤宏曰魯頌閟宮云魯侯之功遂荒徐宅淮夷率從蓋謂此也

十有七年春齊人徐人伐英氏

夏滅項

孰滅之魯滅之何以不言我省文也入杞取鄭取邾取郕皆不言我也猶之會盟書及不曰其人卽知是我也不稱師不稱將將卑師少也胡氏謂內諱滅曰取此不諱者公在會也非也實滅言取非事實也內之惡有大於滅國者矣而不諱獨於滅國諱何也若滅國實當諱公雖在會猶在國也罪豈

末滅乎。○法氏坤宏曰傳云會于淮謀郇且東畧也伐英滅項皆東畧中事又曰書法與滅偃陽同不言遂者非繼生之事懿行謂此以滅項爲齊人伐英氏者滅之也但偃陽言遂故知諸侯因會滅之此不言遂卽知魯人滅之矣

秋夫人姜氏會齊侯于卞

卞魯邑也淮在魯南齊侯罷會過魯姜氏出會之猶陽穀意也傳曰齊以滅項止公聲姜會齊侯而請非也魯齊姻也又最相親狄滅溫齊不問宋伐曹齊不討而獨以項故難魯乎九月公至自會

冬十有二月乙亥齊侯小白卒

十有八年春王正月宋公曹伯衛人邾人伐齊

納昭也昭者齊桓生時蓋嘗屬於宋桓公卒無虧立無虧者



庶長也宋伐齊卒殺無虧而立昭宋與諸侯不知昭之不當立而以爲德於齊桓也又伐喪不義也

夏師救齊

稱師將卑師衆也

五月戊寅宋師及齊師戰于廩丘師敗績

四國伐齊戰獨稱宋者三國同伐不同戰也伐稱宋公戰則稱師者宋公親伐不親戰也

狄救齊

秋八月丁亥葬齊桓公

冬邢人狄人伐衛

傳曰伐衛以救齊狄稱人進之也非也卽進之者當人於救齊之日不當人於伐衛之日趙氏勝飛曰狄稱人便文爾

十有九年春王三月宋人執滕子嬰齊

滕子何以名遂失國也

夏六月宋公曹人邾人盟于曹南

鄆子會盟于邾己酉邾人執鄆子用之

會盟者後會也用之者以祭也傳曰宋使之非也鄆宋使者不當獨稱邾也邾人戕鄆子於鄆豈亦宋使也鄆子不名史闕也

秋宋人圍曹

衛人伐邾

冬會陳人蔡人楚人鄭人盟于齊

外皆稱人內不目公益微者也胡氏曰諱也楚與諸侯會盟之始方氏苞曰諸侯與大夫共盟之始故書會而沒公皆非

也前此者荆人來聘矣不諱聘而諱盟何也後此者嬰齊會  
蜀矣不諱蜀而諱齊何也云惡惡疾其始亦非也惡莫大於  
篡弑而一一書之何不云亦疾其始也內大惡不諱公者多  
矣獨於此焉諱何也春秋諱國惡亦不沒其實若公實在會  
而沒公何以別於公實不在會者也變亂名實豈春秋也然  
則其會奈何傳曰陳穆公欲修齊桓之好爲此會或曰楚人  
攘霸之漸也地於齊者齊亦與盟○公羊經會有公直書  
不諱則知凡言諱公者非矣

梁亡

此未有言伐梁者何以亡自亡也傳曰魚爛而亡也梁內訌  
而外潰秦因取之故不曰秦滅梁

二十年春新作南門

或言新或言新作何也言新有故也言作創爲也言新作非創爲而有加乎故也南門者法門也○方氏苞曰周官匠人營國方九里旁三門內外傳於列國無言南門者豈南門獨天子有與

夏郃子來朝

牟廷相曰鄭樵謂郃有二郃鼎者北部來朝者南部非也果有南北二郃經必曰南郃子如北燕伯之例也今旣不然知無二郃也左傳有莒之二方鼎亦謂莒鼎者西莒與公羊以郃子爲失地之君亦非

五月乙巳西宮災

諸侯三宮夫人居中右媵西左媵東其名爲小寢○法氏坤宏曰禮自命士以上父子異宮故有西東南北諸宮名衛風

稱東宮之妹左傳南宮适北宮喜以宮命氏則西宮亦異宮之通稱爾春秋謹災變故書

鄭人入滑

秋齊人狄人盟于邢

傳曰爲邢謀衛難也衛方病邢

冬楚人伐隨

二十有一年春秋侵衛

宋人齊人楚人盟于鹿上

夏大旱

或言雩或言旱何也雩而得禮不書雩雩而不得雨則書旱或言不雨或言大旱何也不雨者未大旱大旱者久不雨

秋宋公楚子陳侯蔡侯鄭伯許男曹伯會于孟絜宋公以伐宋

先宋主盟也次楚攘霸也傳曰宋求諸侯於楚乃爲會乎孟  
宋以乘車往楚以兵車會於是執宋公以伐宋不言孰執之  
何也親執之者楚也聽之者諸侯也宋人愚楚人詐諸侯瞞  
冬公伐邾

楚人使宜申來獻捷

人疑子字之譌

春秋全經無稱人以使者

來獻捷威魯也執不稱楚獻捷

稱楚互見也執稱宋捷不稱宋亦互見也春秋文約而義明  
傳曰爲宋諱胡氏曰爲魯諱皆非也

十有二月癸丑公會諸侯盟于薄釋宋公

書諸侯者前目後凡也不言孰釋之何也執之者釋之也傳  
曰不言楚不與楚專釋也非也不與楚專釋亦當不與楚專  
執而曰楚人來獻捷矣經言楚傳曰不言楚何也

二十有二年春公伐邾取須句

傳曰須句國也成風母家邾滅之公伐邾反其君然則其曰取何也私爲附庸也俄而升陘之師來矣。案劉氏緣以經無明文疑左氏之妄趙氏李氏汪氏皆從之蓋以須句邑也夏宋公衛侯許男滕子伐鄭

秋八月丁未及邾人戰于升陘

不稱公非公也傳曰公戰而敗績非也及齊人戰于奚何不亦曰公戰而敗績乎謂內諱敗故不稱公非也此未有言師敗績者也謂內不言戰言戰乃敗非也乾時言戰又言敗。檀弓記曰邾婁復之以矢蓋自戰於升陘始也鄭康成注云時師雖勝死傷亦甚是知二國俱有傷敗此經所以書戰不書敗也

冬十有一月己巳朔宋公及楚人戰于泓宋師敗績

宋挾三國伐鄭楚救鄭而戰宋不言三國先歸也春秋三十

四戰未有以師敗乎人以師敗乎人則不量故也

二十有三年春齊侯伐宋圍緡

宋伐喪齊伐敗皆不義也傳曰討其不與盟於齊

夏五月庚寅宋公茲父卒

秋楚人伐陳

冬十有一月杞子卒

稱子爵黜也不名史闕也

莊二十七年冬書杞伯來朝

二十有四年春王正月

夏狄伐鄭

秋七月



冬天王出居于鄭

方氏苞曰其書出何也去王畿而越在鄭地也與皇翟泉異矣傳曰天子無出非也不書天王入何也王室禍亂魯不與聞則史不書。案王出居鄭告使及魯故得書出魯不勤王王入不告故不書入方氏苞謂魯人恥無功而不書非也晉侯夷吾卒

二十有五年春王正月丙午衛侯燬滅邢

何以名傳曰滅同姓名非也滅同姓多矣舍此何以不名朱子曰文與衛侯燬卒連蓋傳寫誤也

夏四月癸酉衛侯燬卒

宋蕩伯姬來逆婦

蕩氏也自逆婦非禮也公自主女亦非禮也

宋殺其大夫

不名者史失之

秋楚人圍陳納頓子于頓

不言遂非繼事不再舉楚人非更端凡諸侯出奔名他國納之則不名互見也頓子出奔不書不告也

葬衛文公

冬十有二月癸亥公會衛于莒慶盟于洮

傳曰衛人平莒於我也衛稱子者既葬稱子踰年卽位卽位稱君。方氏苞曰成公以前列國大夫會盟無以名見者至春秋之終小國大夫會盟無以名見者莒慶何以名魯姻也故史稱名寵異之懿行謂非也稱名不稱名無義例若謂莒慶魯姻獨得稱名明年又名衛甯速其義何居

二十有六年春王正月己未公會莒子衛甯速盟于向  
齊人侵我西鄙公追齊師至鄆不及

侵曰人追曰師互見也傳曰以公之弗及大之非也○方氏  
苞曰戰稱人敗稱師春秋之通例戰稱人者兼將而言也敗  
稱師間亦稱人者別衆寡也胡傳非也

夏齊人伐我北鄙

衛人侵齊

公子遂如楚乞師

師曰乞重師也傳曰非所乞也

秋楚人滅麇以麇子歸

不名史闕也或曰非其罪也非也滅國而名者多矣豈皆其  
罪也傳曰麇祖熊摯不祀祝融鬻熊禮也然而楚人滅而虜

之

冬楚人伐宋圍緡

公以楚師伐齊取穀

公至自伐齊

二十有七年春杞子來朝

夏六月庚寅齊侯昭卒

秋八月乙未葬齊孝公

乙巳公子遂帥師入杞

冬楚人陳侯蔡侯鄭伯許男圍宋

楚稱人臣也諸侯稱爵君也或曰曹南之爵宋也予以霸也  
此圍宋之不爵楚也嫌予以霸也非也霸不霸不繫乎予不  
予聖人亦無予以霸者傳曰楚人楚子也人楚子所以人

諸侯也非也城濮之戰豈亦人楚子也蓋人得臣也鄢陵之戰則子楚子矣。楚稱人不宜序諸侯上疑人當爲子字之

譌

據文二年盟垂隴  
晉士穀序諸侯下

十有二月甲戌公會諸侯盟于宋

公不與圍也諸侯不序前目後凡也。○方氏苞曰此經第書諸侯諱楚大夫先諸侯也文之篇盟扈會扈第書諸侯諱晉大夫先諸侯也非也此盟於宋謂楚必與盟固也不書楚者省文爾若書公會楚人諸侯盟則不辭書公會諸侯及楚人盟則辭費故不言楚卽知盟者有楚也且圍宋之役楚實主兵則此盟楚實主之雖不言楚無嫌楚不與盟也若盟扈會扈不序諸侯史文畧也不書晉人著其實也未有與會盟而不書者經不書晉人何知其中必有晉人乎然則諸侯城緣

陵方氏何知其中必無齊人乎春秋據事直書不沒其實獨於國惡不無少諱而謂列國會盟皆有諱然則春秋諱惡之書乎

二十有八年春晉侯侵曹晉侯伐衛

再舉晉侯兩事也

公子買戍衛不卒戍刺之

刺者殺也內諱殺曰刺刺或言其故或不言其故

據成十年六年

知也傳曰先名後刺殺有罪也非也有罪無罪不繫於名之先後也若以言故不言故則言故者安知非加之罪不言故者安知非當其罪也

楚人救衛

三月丙午晉侯入曹執曹伯畀宋人

執諸侯或稱爵或稱人無義例傳曰稱爵者霸討稱人者非  
霸討非也春秋惡諸侯專執耳非瑣瑣然別其孰爲霸討孰  
爲非霸討也聖人亦何取以霸討予人乎若以稱爵爲霸討  
則執曹伯畀宋人所謂霸討安在乎以稱人爲非霸討則執  
衛侯歸京師所謂非霸討安在乎傳曰曹共公爲不道遠君  
子近小人赤芾乘軒者三百人也畀與也執之是也畀宋非  
也以是爲諉也

詳見成十五年執曹伯歸于京師下

夏四月己巳晉侯齊師宋師秦師及楚人戰于城濮楚師敗績  
晉稱爵君也三國稱師臣也又以著衆也書晉及楚以內及  
外也楚人者成得臣也戰稱人敗稱師者互見也晉之爲此  
戰何也齊桓沒宋襄虜楚虎狼將薦食諸侯晉文扼其吭而  
擊之楚大創數年不出

楚殺其大夫得臣

衛侯出奔楚

出奔皆名衛侯何以不名凡出奔而名者國有二君非名無以別也衛侯出而叔武攝非二君也故不名

五月癸丑公會晉侯齊侯宋公蔡侯鄭伯衛子莒子盟于踐土衛子者何杜氏預曰衛侯出奔其弟叔武攝位受盟非王命所加從未成君稱子序鄭伯下

陳侯如會

如會者後會也不言會盟不盟也

公朝于王所

朝不言所言所非所也王所者踐土也何以不言踐土諸侯在曰踐土王在則曰王所矣王何以在踐土王聞戰勝下勞



晉侯晉侯除踐土而宮焉諸侯朝乎是然則何以不言諸侯  
畧辭也何不先言朝先盟也

六月衛侯鄭自楚復歸于衛衛元咺出奔晉

衛侯出奔不名復歸名何也出奔不名未失國也託之乎叔  
武復歸而名嘗失國也入殺乎叔武奔而名之無以見其未  
失國歸而不名之無以見其嘗失國也此曰復歸後曰歸畧  
辭也殺叔武不書不告也元咺走之晉愬其君

陳侯款卒

秋杞伯姬來

歸寧常事不書非常書之此何以書入杞之怨釋也

公子遂如齊

伐齊之怨釋也

冬公會晉侯齊侯宋公蔡侯鄭伯陳子莒子邾子秦人于溫  
傳曰討不服也

天王狩于河陽

踐土不言王狩省文也河陽言王狩互見也以河陽言狩則  
知踐土亦狩也狩巡狩也傳曰實名而言狩諱也非也卽晉  
實召王王亦必以狩行安得不書狩也河北曰陽其地卽溫  
也於諸侯會曰溫切言之也於天王狩曰河陽大言之也○  
竹書紀年云周襄王會諸侯于河陽春秋書云天王狩于河  
陽推此而言魯史舊文亦當如竹書所記

壬申公朝于王所

冬不書月空書壬申史闕文也再言王所非京師也

晉人執衛侯歸之于京師

李氏光地曰王在京師則曰歸于京師義已備也京師卽玉也王在會所則曰歸之于京師義始備也王旣知其事矣歸其人於京師耳懿行謂或言歸于或言歸之于者詳畧辭耳衛元咺自晉復歸于衛

晉文聽臣訴而執君僨也元咺挾霸權以歸國仇也凡歸者或言歸或言復歸文有詳畧耳或曰歸善辭復歸惡辭非也諸侯遂圍許

諸侯者朝王之諸侯遂繼事也繼朝王之事諸侯不序前目後凡也圍許者討不服也

曹伯襄復歸于曹遂會諸侯圍許

自宋歸也不言者畧辭也執不名復歸名何也義與衛侯鄭同。此歸或書自某或不書自某赴告有詳畧耳傳曰自某

者某有奉非也

二十有九年春介葛盧來

介微國葛盧名不稱朝不能行朝禮公在會故冬復來

公至自圍許

夏六月會王人晉人宋人齊人陳人蔡人秦人盟于翟泉

傳曰謀伐鄭也王人王之下士也內不目公外皆稱人皆卿大夫也王人與諸侯會可也與諸侯之大夫會不可也卑王之使卑王也晉文爲之也翟泉近王城公然會盟疆偏甚矣或曰內諱公外人諸國之卿貶也非也此皆人矣何知會必有公也。公羊穀梁經上有公亦無諱公之說

秋大雨雹

雹冰雨也大則爲災故書無月日史闕也。高氏閔曰劉向

云虺者陰脅陽也殺者陽薄陰也春秋不書殺猶不書月食冬介葛盧來

三十年春王正月

夏狄侵齊

秋衛殺其大夫元咺及公子瑕

以咺及瑕何也瑕非能立也咺存則存咺死則死瑕立踰年不稱君何也非君也瑕爲咺私立衛侯尙在故不稱君

衛侯鄭歸于衛

歸易辭也咺死而歸易矣何以不言歸自京師畧辭也

晉人秦人圍鄭

鄭不與翟泉之盟以爲貳於楚也而討之經言晉人秦人傳言晉侯秦伯非也

介人侵蕭

冬天王使率周公來聘

公子遂如京師遂如晉

冢宰下聘國卿報聘若敵國然前此內大夫未有如京師者自此始晉文爲之也胡氏謂以二事出是夷周於晉非也先周後晉未爲不可

三十有一年春取濟西田

傳曰曹田也何以不繫曹蓋魯故田也濟西大名也田何以不目取者多畧辭也凡內取田邑不繫國者皆魯故田濟西汶陽是也繫國者取邾田是也邾東沂西不繫國者蒙上伐

邾文也

見襄十九年哀二年

公子遂如晉

夏四月卜郊不從乃免牲猶三望

魯郊非禮也卜郊何也卜日與牲日用辛不於冬至於祈穀  
避王也夏四月何爲乎牲有二帝牛不吉卜稷牛遠怠慢也  
凡卜日比旬而卜之更三旬吉則爲凶則已若牲更三卜皆  
不吉亦不郊何有四卜乎不從者龜逆也乃者不得已也免  
猶縱也免牲則不郊矣傳曰免牲者爲之緇衣纁裳有司玄  
端奉送至於南郊免牛亦然然則或言牲或言牛何也未牲  
曰牛旣卜曰牲猶者可以已也何謂三望傳曰泰山河海杜  
預曰星辰山川禮有四望去一下天王也望者郊之餘也不  
郊何爲乎望魯僭郊於是始案周禮大司樂四望蓋祀天神之屬注云星辰風雨其下方言  
祭山川與公羊杜氏異未知其  
審鄭氏云三望淮海岱恐非也

秋七月

冬杞伯姬來求婦

非歸寧也特以求婦來也自求婦非禮也凡言婦者有姑之辭

狄圍衛

十有二月衛遷于帝丘

狄侵齊不知圍衛不問於是遷帝丘而避焉病晉文也

三十有二年春王正月

夏四月己丑鄭伯捷卒

衛人侵狄

秋衛人及狄盟

再舉衛人兩事也

冬十有二月己卯晉侯重耳卒



重耳自狄入晉不書入不告也凡外事告則書

三十有三年春王二月秦人入滑

齊侯使國歸父來聘

夏四月辛巳晉人及姜戎敗秦師于殽

晉稱人大夫將也傳曰晉子親之貶而稱人非也如當貶者直書晉子文乃是貶今日晉人而已何由知爲晉子乎晉文甫沒秦人下兵畿內有窺周室主夏盟之心伯禽衰經與戎晉子墨經發命亦奚不可乎是役也先軫實爲謀主傳曰子墨衰經遂發命而已不言晉子親之也姜戎稱及晉爲主也秦人滑稱人敗穀稱師互見也。晉人敗狄于箕晉人伐許皆在是年二傳不云稱人是貶何也

癸巳葬晉文公

春秋左傳卷五  
狄侵齊

公伐邾取訾婁

秋公子遂帥師伐邾

晉人敗狄于箕

冬十月公如齊

十有二月公至自齊乙巳公薨于小寢

小寢非正也傳曰卽安也

隕霜不殺草李梅實

或舉草或舉菽何也殺菽秋寒也不殺草冬煖也冬當無草

故不殺爲異秋當有菽故殺爲異李梅實實爲異。傳云舉

重舉輕非也

隕霜殺菽見定元年

晉人陳人鄭人伐許

春秋說暑卷五

春秋說暑

卷五

三

春秋說略卷六

棲霞郝懿行學

海陽趙銘彝校刊

文公

元年春王正月公卽位

傳曰繼正卽位正也卽位改元必於歲首正始也公未葬何以卽位卽位者以踰年爲限不以葬爲限未葬何以稱公稱公者以卽位爲限不以葬爲限卽位者易服告廟臨羣臣事畢反喪服○胡氏據虞商書謂冢宰攝告廟臨羣臣朱子曰他事可攝卽位不可攝又曰王侯以國爲冢雖先君之喪猶以爲己私服明知卽位必吉服矣

二月癸亥日有食之

天王使叔服來會葬

叔氏服名士也或曰大夫也諸侯葬天子使大夫會禮也凡外大夫來會葬不書此書者尊王使

夏四月丁巳葬我君僖公

天王使毛伯來錫公命

錫先君命則舉諡錫時君命則稱公皆非禮也傳曰禮有受

命無來錫命錫命非正也

舉諡見莊元年

晉侯伐衛

叔孫得臣如京師

衛人伐晉

秋公孫敖會晉侯于戚

大夫特會諸侯於是始

冬十月丁未楚世子商臣弑其君頤

春秋討亂賊非能誅其身也而曰亂賊懼何也凡春秋書之卽討之矣惡乎討之以君父討之稱世子者以父討之稱其君者以君討之。○啖氏助曰楚僭號已久世子必不誓於天子今以商臣大逆故特書世子以明其罪懿行謂不特此也凡春秋以世子書者蓋皆不誓於天子也然不稱世子更別無可稱故知稱者窮於辭耳。○方氏苞曰世子弑君未有直赴鄰國者蓋皆以傳聞書也非也弑逆大惡春秋不以疑加人傳聞之辭奈何輕以坐人乎竊謂弑逆之賊雖不肯直赴鄰國但其國史不容不書孔子修春秋於列國寶書蓋當親見如董狐南史輩直筆見存皆確有依据而謂傳聞之辭便筆之於書乎必不然矣

公孫敖如齊

二年春王二月甲子晉侯及秦師戰于彭衙秦師敗績

戰稱人敗稱師常也此戰敗皆稱師師衆也○方氏苞曰赴告第稱師而不及主兵者則莫辨其爲君爲大夫故第稱師也非也此自將卑師衆耳君將不稱師

丁丑作僖公主

主依神也古者葬而虞期而練練而耐其祭三其主二虞者喪主也練者吉主也喪主桑吉主栗栗主藏桑主埋桑主祭於寢栗主耐於廟僖公薨十五月矣而作主爲虞乎爲練乎或曰蓋耐也將躋僖公疑之是以緩

三月乙巳及晉處父盟

孰及之蓋微者也微者何大夫也大夫何以不名大夫之名不登於春秋春秋名者皆卿也處父不氏闕文也何以知非

未賜族也伐江稱氏矣

見三年

盟不地者於晉也此卿大夫盟

何以書晉之國都而卿大夫盟乎是以是爲伉也○傳曰不言公爲諱也非也不言公何以知其爲公也曰處父去氏也非也卽去氏者何以別於秦術吳札也若曰貶也以卿大夫伉盟諸侯於國都直書公及晉陽處父盟不愈見貶乎傳曰何以不言公如晉所恥也出不書反不致也非也出不書反不致其非公也明矣如實公者出不書反不致何足殺恥乎又何以別於非公者也

夏六月公孫敖會宋公陳侯鄭伯晉士穀盟于垂隴

傳曰晉討衛也此士穀主盟序諸侯下大夫不先諸侯也

自十有二月不雨至于秋七月

歷時而言不雨者不憂雨也不言八月雨者不喜雨也○言



自至于者總畧之辭公不憂雨故書辭從畧十年十三年自正月不雨至于秋七月義竝同

八月丁卯大事于大廟躋僖公

有事者時禘也大事者大禘也禘何以爲大事諸侯之祭無大於此也然則何以不曰禘春秋文不虛設凡不曰祭名者無譏於祭也曰祭名者有譏於祭也此於祭無譏故不曰也何謂時禘四廟之主合食於大廟何謂大禘毀廟之主皆陳於大廟躋升也何謂躋僖公先之乎閔也閔雖弟君也僖雖兄臣也古者父子異昭穆兄弟同昭穆於魯之祭明惠莊爲昭皆南面西上隱桓閔僖爲穆皆北面西上於其位之序則隱在西桓次之閔在西僖次之

冬晉人宋人陳人鄭人伐秦

傳曰報彭衙也其稱人大夫也或曰貶非也

公子遂如齊納幣

納幣何以書譏喪娶何以不於娶焉譏娶在喪外納幣在喪內三年之內不圖婚○昏禮先納采問名納吉乃納幣今言納幣則三者更早可知

三年春王正月叔孫得臣會晉人宋人陳人衛人鄭人伐沈沈潰夏五月王子虎卒

王臣無外交何以卒告則卒弔則卒卒非也葬甚矣○孔氏穎達曰王子虎卽王叔文公也諡之爲文必當有爵不書爵者畿內之國不得外交諸侯其臣不敢赴魯必天子爲之赴赴以王子爲親不復言其爵也

秦人伐晉

春秋左傳卷六  
秋楚人圍江

雨蝻于宋

雨者自上而下蝻來衆多勢如雨降在宋之境禾稼盡矣又食屋之茅茨○傳曰墜而死非也蝻本以災書墜而死又何書乎

冬公如晉十有二月己巳公及晉侯盟

公蓋卽位始朝於晉也則知及處父盟者非公也○二年傳曰晉人討公不朝使處父盟公以恥之此傳又曰晉人懼其無禮於公也請改盟非也前乎此者魯君未嘗朝晉也文公立甫十六月晉遽以不朝來討此非人情旣盟以恥之而又懼其無禮何也此皆傳者妄說何足信也

晉陽處父帥師伐楚以救江

伐未有目其故者此何爲伐以救伐其事也救其意也。李氏光地曰若止書救江則處父之師向楚而不向江故書法如此懿行謂若止書伐楚又無以見意爲救江及避實擊虛之本謀也此與成宋亂宋災故之類皆經文自下注解不待傳而明者也

四年春公至自晉

夏逆婦姜于齊

卿爲君逆稱夫人臣子辭也此不稱夫人公自逆也何以不稱公蒙前文也公旣自逆矣若書公逆夫人于齊則不辭書公逆婦姜於齊則又不辭故不稱公也謂諱公者非也婦者有始之辭姜不氏何也文畧爾王姬歸于齊言姬不言氏紀季姜歸于京師言姜不言氏其有言者何也文有詳畧非義

例也謂不氏爲貶者非也姜卽氏矣而云去氏以貶是猶言  
東方西方而云去方以貶也然則亦可云加方是褒也夫言  
東西矣卽不言方可知爲東西方也言婦姜矣卽不言氏亦  
可知爲姜氏也今不可謂去方是貶顧可謂去氏是貶乎曰  
婦姜曰夫人婦姜旣皆爲貶矣則未知曰夫人婦姜氏獨何  
以爲褒也喪圖婚者公之失何爲貶去夫人之氏乎夫人不  
致何也凡致以告廟書也告廟則致不告廟則不致

狄侵齊

秋楚人滅江

晉侯伐秦

衛侯使甯俞來聘

冬十有一月壬寅夫人風氏薨

此非夫人何以夫人之戚乎夫人也然則仲子何以不夫人之猶未成乎夫人也

五年春王正月王使榮叔歸含且賵

珠玉曰含含所以實口也含賵二事言且者兼之王不稱天或曰貶也非也妾僭嫡不重於臣篡君錫命桓公一貶而已會葬成風何故再貶

三月辛亥葬我小君成風

王使召伯來會葬

先葬後會不及葬也與元年會葬僖公文異以是知之傳曰會葬之禮於鄙上

夏公孫敖如晉

秦人入都

秋楚人滅六

冬十月甲申許男業卒

六年春葬許僖公

夏季孫行父如陳

秋季孫行父如晉

八月乙亥晉侯驪卒

冬十月公子遂如晉葬晉襄公

晉殺其大夫陽處父晉狐射姑出奔狄

傳曰狐射姑使續鞠居殺之是兩下相殺也經何以書晉殺

乎書晉殺則非射姑殺明矣處父殺而射姑奔此與佞夫殺

而王子瑕奔何以異傳未可信

殺佞夫見襄三十年

閏月不告月猶朝于廟

閏月者非常月也中朔大小不齊正之以閏積分而成於月  
不告月者不告朔也不言朔言月者胡氏謂主乎月而有閏  
故以月言也諸侯必告朔何也尊王敬祖也朝于廟何也諸  
侯親廟三皆月祭之其禮簡故不言祭而言朝也公忘棄時  
政以閏爲附月不復告朔猶者可已而幸其不已也經書閏  
歲終此閏亦是十二月也當時歷法疏謬左氏遂以閏三月  
爲非禮穀梁以爲附月之餘日所謂附者亦是附於歲終也  
○馮氏荆南曰告朔非告於廟也以是月應行之政告羣臣  
耳閏月不告月猶朝于廟則爲二事可知矣旣朝于廟何難  
以朔告哉魯論子貢欲去告朔之餼羊餼饒生者之辭也蓋  
以月政告羣臣而因以餼之也

七年春公伐邾

三月甲戌取須句遂城郕



僖公嘗伐邾取須句矣此復言取則中閒嘗失之可知以此復書取則邾人取之不必書春秋文簡而義明諸如此者皆互見也城郛備邾也

夏四月宋公王臣卒

宋人殺其大夫

不名史闕也。方氏苞曰赴告不及以傳聞書其名不可得詳也非也宋司城來奔其名非不得詳矣而亦不書名何也

見年

謂以傳聞書亦非也

戊子晉人及秦人戰于令狐晉先蔑奔秦

稱人者大夫將也不稱師師少也言戰不言敗勝負敵也言奔不言出在外也

狄侵我西鄙

秋八月公會諸侯晉大夫盟于扈

諸侯不序畧辭也大夫不名衆辭也與盟蕮同矣莊九年何以

盟傳曰晉侯立故也又曰公後至故不書所會非也諸侯不序大夫不名無以見爲公後至也卽後至者何以得書會書盟也胡氏謂趙盾內專廢置外強諸侯爲盟不名者見大夫強非也見大夫強反不書大夫之名何足見強乎方氏苞謂義在大夫不在趙盾非也新城書趙盾不聞義在趙盾也垂隴書士穀不必義在士穀也齊大夫盟蕮又不聞義在齊大夫也

冬徐伐莒

公孫敖如莒蒞盟

八年春王正月

夏四月

秋八月戊申天王崩

冬十月壬午公子遂會晉趙盾盟于衡雍

乙酉公子遂會雒戎盟于暴

盟趙盾盟雒戎兩事也故再稱公子不同日故各日其會胡氏以爲別內外非也

公孫敖如京師不至而復丙戌奔莒

如京師弔也不至而復逃也未至者緩辭不至者決辭還者事已畢復者事未畢傳曰奔莒從已氏也不言出在外也其之罪甚矣魯亦不更使人往

螽

宋人殺其大夫司馬宋司城來奔

司馬司城其官也未有書官者此何以書不知也傳曰公子  
卬黨昭公坐是被殺蕩意諸效節而走之然則何以不名不  
知也方氏苞謂貴之故不名蓋魯史之情非春秋之法也史  
不書其名孔子亦無從而益之矣。程子曰諸侯之卿皆不  
書官以不受命於天子故不與爲卿惟宋王者後得命官故  
宋卿獨書官懿行案左氏傳凡書宋亂必列序六官與他國  
異程子之說恐是方氏非之殆不然

九年春毛伯來求金

夫人姜氏如齊

二月叔孫得臣如京師辛丑葬襄王

毛伯求金供葬也不稱王使未葬也王葬會則書

晉人殺其大夫先都

三月夫人姜氏至自齊

夫人如齊歸寧也反而告廟所以得書然則夫人何爲有致有不致告廟則致不告廟則不致夫人何爲有告有不告以禮行則告不以禮行則不告或雖以禮行慢亦不告也然則致夫人何爲與公同夫人與公一體也

晉人殺其大夫士穀及箕鄭父

晉殺三郤不稱及此稱及者蓋以貴及賤也方氏苞曰趙盾殺之非也趙盾殺經何以書晉人殺乎胡氏例以稱人以殺爲國亂無政衆人擅殺非也方氏又謂殺大夫非若弑君可目其人兩下相殺不書雖得其主名舍晉人無以稱也非也以理揆之衆人擅殺而無主名者宜書盜盜殺陳夏區夫是也有主名者宜書名王札子殺召伯毛伯是也而謂兩下相

殺不書有是理乎國君專殺猶惡之若兩下相殺所謂先有無君之心而後動於惡履霜堅冰此其漸矣乃謂殺大夫非若弑君可目其人不亦謬乎凡春秋書殺大夫義繫於殺所以著國君專殺之罪與失政刑耳義不繫於稱國稱人也方氏又謂弑君稱國爲懸獄稱人爲無主名亦非也

楚人伐鄭公子遂會晉人宋人衛人許人救鄭

夏狄侵齊

秋八月曹伯襄卒

九月癸酉地震

震動也地靜以動爲異地何爲震陽伏而不出陰遷而不烝於是乎震不目其地者地異廣遠不限一方故地震山崩不

繫國

春秋地震五

冬楚子使椒來聘

楚稱子便文爾不可曰楚使椒又不可曰楚人使椒也或曰  
襄之或曰進之皆非也春秋黜吳楚何爲進之襄之也若以  
來聘爲美前此者會于孟執宋公稱子矣後此者次厥貉伐  
麇稱子矣豈亦爲進之襄之乎椒不氏畧之也

秦人來歸僖公成風之襚

衣服曰襚孰爲襚兼襚也若非兼襚則不須言僖公也成風  
嘗稱夫人矣此何以不夫人也便文爾不可曰僖公夫人成  
風又不可曰夫人成風僖公也然則子亦可以先母乎母以  
子貴傳曰秦人弗夫人也非也魯人夫人之秦人安得不夫  
人之乎

葬曹共公

十年春王三月辛卯臧孫辰卒

夏秦伐晉

秦無人畧辭也或曰黜秦非也

說見昭十二年  
晉伐鮮虞下

楚殺其大夫宜申

自正月不雨至于秋七月

及蘇子盟于女栗

孰及之蓋大夫也大夫亦可盟王臣乎奚不可也翟泉是矣

信二十九年王臣之爵視諸侯大夫既可盟諸侯奚不可盟王臣

乎何以知非沒公也公與大夫盟則不諱與王臣盟焉諱何

也出不書反不致則非公也可知矣然則逆婦姜于齊亦出

不書反不致何由知必是公也以不書夫人知之也蘇子者

何周卿士也或曰卽溫子非也溫滅矣此蘇子也或曰蘇子



畿內諸侯子爵也何以盟傳曰頃王立故也或曰私交也○  
陸氏淳謂畿內諸侯皆曰子殷制已然方氏苞非之謂蘇子  
稱子非五等之爵蓋特爲是稱以尊異之又謂自是以後會  
盟征伐王臣與諸侯列序皆稱子非也王臣皆稱子而召伯  
毛伯復不稱子何也孟子曰天子之卿受地視侯大夫受地  
視伯元士受地視子男祿旣視之則爵當視之可知方氏謂  
王臣無五等之爵非也又謂春秋王臣無稱侯男者則伯與  
子非爵亦非也伯與子蓋春秋時適有此爵耳且如漢世功  
臣止有列侯而無伯子男豈亦可云非爵也

冬狄侵宋

楚子蔡侯次于厥貉

傳曰將伐宋也不言伐蓋宋服故

十有一年春楚子伐麇

夏叔仲彭生會晉卻缺于承匡

公穀經無仲字

傳曰謀諸侯之從楚者○叔仲彭生公穀經皆無仲字以十四年伐邾證之此蓋衍文

秋曹伯來朝

公子遂如宋

狄侵齊

冬十月甲午叔孫得臣敗狄于鹹

傳曰長狄鄭瞞也自晉人敗之箕其後侵齊侵魯侵宋至是復侵魯得臣獲其渠魁鄭瞞遂弱

十有二年春王正月邾伯來奔

不名者史失之也或曰莊八年邾降于齊師自是入齊爲附

庸故來奔不名非也附庸之君失地亦當書名或曰不名者有攝君如衛侯鄭矣。傳曰邾太子朱儒以邑來奔公以諸侯逆之故稱邾伯非也以子叛父又未卽位安得爲邾伯也杞伯來朝

其稱伯蓋爵復進故

二月庚子子叔姬卒

稱子者時君女也不繫國未嫁也。傳曰不言杞絕也啖氏助曰左傳大誤當在成八年誤置此耳。方氏苞曰十四年齊人執子叔姬時君之子不應有兩叔姬豈此經承庚子之文而錄者誤衍與

夏楚人圍巢

秋滕子來朝

秦伯使術來聘

冬十有二月戊午晉人秦人戰于河曲

不言及闕文也傳曰以其亟戰畧之或曰二國邊邑之爭故  
不書及皆非也不言敗交綏而退勝負敵

季孫行父帥師城諸及鄆

稱及者先後之辭帥師而城畏莒故也鄆者莒魯所爭○舊  
說魯有二鄆此東鄆近莒故杜預曰莒魯所爭成四年所城  
乃西鄆近晉故杜預曰備晉也

十有三年春王正月

夏五月壬午陳侯朔卒

邾子貜莒卒

自正月不雨至于秋七月

大室屋壞

大室者大廟之室屋何以壞自壞也天久不雨而廟屋自壞志不敬也壞則必修何以不書凡新宮廟不書非禮書。公羊經大字作世傳曰魯公稱世室如此則魯有不毀之廟二故吳氏敬以爲僭然經不書新作世室則亦未爲非禮也冬公如晉衛侯會公于沓

狄侵衛

十有二月己丑公及晉侯盟公還自晉鄭伯會公于棐會于沓會于棐要會也蓋介公以通於晉也

十有四年春王正月公至自晉

邾人伐我南鄙叔彭生帥師伐邾

夏五月乙亥齊侯潘卒

六月公會宋公陳侯衛侯鄭伯許男曹伯晉趙盾癸酉同盟于新城

傳曰從於楚者服且謀邾也凡盟會書日或舉於首或舉於中舉於首者會之日卽盟之日也舉於中者會在先盟在後也

秋七月有星孛入于北斗

有者不宜有也星孛者孛星也先言星外孛於星也孛謂之彗邪氣所生北斗者辰星也言入者斗有環域入其魁中。傳曰宋齊晉之君當此蓋北斗衆星紀綱三國諸侯紀綱言不出七年者斗數七也然天道幽遠其應難知故無取焉

公至自會

晉人納捷菑于邾弗克納

晉人者誰或曰趙盾或曰卻缺或曰卻克不知也傳曰捷菑  
晉出也爲是納之邾人曰齊出獲且長於是引而去之弗克  
者義弗克也以晉之彊也而不能行於邾非義故也傳曰稱  
人貶也非也曰弗克納其罪已見何待貶也。胡氏謂內以  
諱爲貶外以諱爲善非也聖人爲魯臣子於外何諱焉

九月甲申公孫敖卒于齊

奔大夫不卒此何以卒爲受其喪卒也受其喪則何爲卒不  
受其喪非大夫也受其喪則大夫矣大夫卒矣

齊公子商人弑其君舍

舍未踰年何以稱君凡遇弑雖未踰年稱君稱君所以重弑  
也

宋子哀來奔

子哀者何不知也傳曰高哀爲蕭封人不義宋公辭卿而奔  
書字賁之方氏苞曰非也古有以子某名者陳子亢介子推  
是也春秋無以字書者

冬單伯如齊齊人執單伯齊人執子叔姬

單伯魯大夫也子叔姬魯女也舍遇弑叔姬其母也魯使單  
伯唁之商人怒而執焉再稱齊人兩事也不以單伯及子叔  
姬別嫌也。方氏苞曰傳以叔姬爲舍母非也果舍母則當  
書齊人執其君之母叔姬蓋姬舍所聘至齊舍已見弑不得  
稱君夫人懿行謂非也春秋比事屬辭文約而義明上書弑  
舍下書執子叔姬則知爲舍母也猶之上書子卒下書夫人  
姜氏歸于齊則知爲子母也何必書君之母始見乎其謂叔  
姬爲舍所聘尤非也五月齊侯潘卒九月舍已遇弑中閒纔



四月苦塊之中豈卽圖婚果以喪婚經當書齊人來逆子叔姬而又不言果何見而云舍所聘乎此說蓋本之吳氏澂而誤

十有五年春季孫行父如晉

三月宋司馬華孫來盟

方氏苞曰不名何也魯人以爲敏而貴之猶齊仲孫高子宋司馬司城之不名耳不書使非奉命而來盟也

夏曹伯來朝

齊人歸公孫敖之喪

敖以罪出不當受其喪魯人感子以敖父非禮也歸不言來齊人止至境孟氏迎以歸

六月辛丑朔日有食之鼓用牲于社

單伯至自齊

大夫不致執則致

晉卻缺帥師伐蔡戊申入蔡

秋齊人侵我西鄙

季孫行父如晉

冬十有一月諸侯盟于扈

諸侯不序畧辭也晉靈公之世大夫數出會諸侯大夫彊也  
諸侯多不序散辭也霸業衰故。傳曰謀伐齊齊人賂晉侯  
不克而還非也若晉侯主盟經何不書也方氏苞曰盟扈會  
扈蓋以晉大夫實序諸侯上故總言諸侯而沒晉大夫非也  
若大夫主盟經何不書也大夫雖主盟仍序諸侯下垂隴新

城是也

見二年及十四年

十有二月齊人來歸子叔姬

來歸者大歸也稱齊人者制在齊人也

齊侯侵我西鄙遂伐曹入其郭

侵魯者以怒魯故伐曹者以朝魯故郭者城外郭

十有六年春季孫行父會齊侯于陽穀齊侯弗及盟

可以會亦可以盟何以弗及難魯也於是公有疾齊曰請侯  
君閒未幾以路故盟于鄆丘

夏五月公四不視朔

或言月或言朔者朔舉始月舉終或言告或言視者謁上曰  
告臨下曰視告於廟視於朝四不視朔是四月不朝也何不  
曰不朝視朔重於視朝也公之不視朔奈何疾也或曰非疾  
也託也不言猶朝於廟則朝廟亦廢矣。傳曰自是公無疾

不視朔也非也蘇氏轍曰五月書四不視朔則六月視朔矣  
視朔之廢非始於此也

六月戊辰公子遂及齊侯盟于鄆丘

秋八月辛未夫人姜氏薨

毀泉臺

毀者墮之盡傳曰泉臺耶臺也築之非毀之非非祖之爲而  
毀之是非祖矣喪不貳事貳事忘哀也

楚人秦人巴人滅庸

不稱及莫適爲主也庸國也

冬十有一月宋人弑其君杵臼

弑者或稱人或稱國或稱名何也傳信稱名疑者稱人啓者  
稱國傳曰稱人者君無道非也君卽無道弑者亦賊也又曰

賤者稱人非也若賤者稱人是釋賊不討也以理揆之弑君之賊雖賤亦宜書名不得以微者之名不登春秋例之也獨陰賊而無主名者乃宜稱盜耳杵臼何以弑傳曰帥甸攻而殺之則未知誰弑君者也○方氏苞以稱人爲微者稱國爲懸獄亦非也稱國稱人皆懸獄稱人者三朱杵臼齊商人莒密州稱國者四莒庶其晉州  
蒲吳僚  
薛比

十有七年春晉人衛人陳人鄭人伐宋

傳曰討弑君猶立文公而還卿不書失其所也非也卽失所者人之何爲外卿大夫恒稱人非貶也

夏四月癸亥葬我小君聲姜

齊侯伐我西鄙

六月癸未公及齊侯盟于穀

諸侯會于扈

傳曰平宋也左氏以二扈皆晉侯親之方氏苞以二役實趙盾主之皆非也

秋公至自穀

冬公子遂如齊

十有八年春王二月丁丑公薨于臺下

秦伯營卒

夏五月戊戌齊人弑其君商人

商人弑君者也齊人弑弑君者也何爲不以國討之辭書非國討也以爲賊也則不當君之以爲君也而弑之是弑君而已矣故不從州吁無知之例。傳稱祁歇閭職經不書名疑傳所云者未必實

六月癸酉葬我君文公

秋公子遂叔孫得臣如齊

書使不書介常也此何以書卿介卿也其卿介卿奈何遂欲弑君結外援挾國卿同往得臣爲與乎弑者也

冬十月子卒

方氏苞曰子卒而不地葬而不書故也子般之卒日黨氏微之也子野之卒日季氏告之也子赤之卒不日蓋事在宮闈不可得而考矣。又曰傳載叔彭生之死而不見於經孔子削之也非也彭生不卒安知非史闕之抑或畏仲遂而不敢書也此不得謂孔子削之若謂發後人之疑則纂弑之迹書法顯然亦不待削彭生之卒而見也卒又法不當削

夫人姜氏歸于齊

歸者大歸也夫人子赤之母子卒夫人歸篡弑之迹顯然矣  
季孫行父如齊

致夫人也前乎子卒則如齊後乎子卒則如齊是齊與聞乎  
故也成乎弑逆之謀者遂得臣行父

莒弑其君庶其

弑君或稱人或稱國文有詳畧皆疑獄而未有所歸也○傳  
曰僕因國人以弑紀公舊說以已古通用明非莒僕弑君也  
若莒僕實弑則當自立何爲以寶玉奔魯乎非僕弑君故經  
不書名

春秋說畧卷六